

## REGIONAL NEWS

HEADLINES:-

1. Governor Dr Hari Babu Kambhampati-an ram zalenna champha vawi 78-na naktuka lawm tur pualin state mipui te chibai a buk .
2. Naktuka Independence Day lo thleng tur, boruak muanawm tak hnuaiah lawm anih theih ang venhimna pawh khauh taka kenkawh a ni.
3. Prime Minister Narendra Modia hoin naktukah Independence Day vawi 78-na Dehli-a Red Fort ah hman a ni ang.
4. Kumin Independence Day pualin Police, Fire, Home Gaurd and civil defence leh Correctional service atangin mi 1037 chawimawina hlan an ni.

&lt;&gt;&lt;&gt;&lt;&gt;

I DAY-GOVERNOR

Governor Dr Hari Babu Kambhampati-an ram zalenna champha vawi 78-na naktuka lawm tur pualin state mipui te chibai a buk a, ram tana Zalenna sualtu te inpekna zahawm tak hre reengin ram pumpuia khua leh tui te rualin hnam pasalthate zah takin chibai a buk tih a sawi a ni.

Independence Day lawmna puala a thuchahah Governor chuan Prime Minister Narendra Modi an kum 2047-a ram changkang-developed nation a India ram hlankai a tumna thlawp turin mipuite a chah a, Viksit Bharat ni turin Viksit Mizoram nih tum hmasak a ngai a ni, a ti.

Larsap chuan Mizoram chu sum leh pai lama harsatna tawk State a nih thu sawiin hetiang dinhmun ah hian mipui vantlang ten Central Sawrkar hnuaiah social security scheme tam tak a awm tih an hriat a ngai a, heng scheme hrang hrangte hi a kaihnawih thuneitute, bank leh official dangte hnen atanga zawtfiah turin mipuite a chah nghal tih a sawi bawk a ni.

Mizorama hmasawna ruhrel lian tham zawk te din ti harsa em em tu pakhat chu inkalpawhna kawngpui tha tawk lo chu a ni a ti a, hei vang hian Bairabi-Sairang Railway line siam zawh hun tur a nghahhlelhwam takzeta, achhan chu he Rel Kawng hian Mizoram hmelhmang a la rawn thlak danglam dawrh dawn a ni a ti a. Chutih rualin Central sorkar atanga sum tam tak Kawngpui siamna atan Mizoramin a dawng chungka kawngsiam hna tam zawk te zawh a ni lo chu a paw ka ti takzet a ti a, dam khawchhuahna kawngpui tih mai, Vairengte-Sairang National highway 4-lane zawh a la ni lo phei hi chu a paw zual a, chhut thiam phak bakin mi a ti thuanawp mek a ni, a ti. Kawngpui tha neih hmasak hi hmasawna ruhrel lian dang te din tura thil pawimawh hmasa ber a ni tih hriat ni se a ti a ni.

Independence Day hi a lawmna pui ber chu Aizawl Lammualah naktuk zing dar 8:00 ah neih a ni ang a. He hunah hian Chief Minister Pu Lalduhoma chu khuallian a ni ang.

Mizoram sawrkar chuan he hun pawimawh tak hmang tur leh a hmanna hmunah te, tel theuh turin khua leh tui zawng zawng te a sawm a. A bik takin sawrkar hnathawkte chu Independence Day lawmna programme-ah tel ngei tura hriattir an ni.

Lammuala Independence Day programme hman zawh a nih hnu chawhma dar 11 ah sawm bikte tan Governor's 'AT HOME', Raj Bhawan-ah a awm leh dawn bawk a ni.

Independence Day hi Mizoram district khawpui tinah leh hmundangah te pawh lawmna hun hman tura ruahman a ni.

<><><>

#### I-DAY SECURITY

Naktuka Independence Day lo thleng tur, boruak muanawm tak hnuaiyah lawm anih theih ang venhimna pawh khauh taka kenkawh a ni a,

IGP (law and order) Pu Lalbiakthanga Khiangte sawi danin, Aizawl leh state chhung khawpui dangah te venhimna uluk zual a ni a, khawi atang maha thil duhawmlo thleng a awm loh na turin Police chuan hman an la a ni a ti a, Aizawla Independence Day lawmna pui ber neihna hmun tur Sipai lammual leh a chhehvelah pawh ngawrh leh zuala duty a ni a ti.

Traffic pawh khauh taka duty tir an ni a, lirthei vak vel tibuai lo turin he ni lawmnaa tel te chuanna lirthei hunna tur pawh ruahman fel vek a ni tawh bawk a ni.

Hetihlai hian, ramri ah te pawh security uluk taka dah a ni tih Pu Lalbiakthanga chuan a sawi a, thenawm ram te leh state dang te nena inrinaah te police leh paramilitary force te dah an ni a, Bangladesh ramchung buaina thleng mek avangte pawhin ramri hi uluk leh zuala ven a ni tih a sawi a ni.

<><><>

#### PHE MINISTER PRESS CONF

PHE Minister Prof. Lalnilawma chuan vawiin khan a pisaah chanchinbumite a kawm a, Mizoram sawrkar thuchhuak angin Mizoram Ground Water Act, 2023 leh Rules 2024 dan hman a nih takah chuan lei chhung tui la chhuaka hman tum reng reng ten sorkarah phalna an dil a ngai tawh a ti.

Minister chuan he dan kengkawh tu turin Mizoram State Ground Water Authority (MGSA) din a nih thu a sawi a, state puma lei chhung tui hausakna humhalh leh hman dan mumal takin kalpui a nih tur thu a sawi a. He dan hnuaiyah hian tui lakchhuah phalna dan, registration leh licensing pek dan, khap leh humhalh dan leh dan zawm lote hremna a awm a ni a ti.

PHE Minister chuan lei chhung tui la chhuaka hman tum reng reng te chuan Mizoram State Ground Water Authority hnenah form awm sa hmanga dilna thelutin, phalna pekte chauhvin lei verhin lei chhung tui an hmang thei dawn tih a sawi a. Lei chhung tui la chhuaka hmang

mek leh leiverhna khawl nei reng reng te chuan MSGA-ah dilna form awmsa thehlutin inziah luh tur a ni a ti.

Prof. Lalnilawma chuan lei chhung tui tam tawklohna hmun atanga tui lak chhuah khap a nih thu a sawi bawk a. He dan bawhchhia, phalna neiloa hma la lui emaw, khawl register loh hmanga leiverhte chu hremna pek an nih tur thu a sawi a ni.

<><><>

#### I-DAY WALKATHON

Excise & Narcotics dept huaihawt India ram Independence Day vawi 78-na lawmna atan leh ruihhlo dona atana Ruihhlo Do Kawngzawhpui - WALKATHON - Walk Against Drugs chu vawiin khan neih a ni a, thupui atan - Kan tanho phawt chuan khawtlang him zawk, hrisel zawk leh ruihhlo laka fihlim kan din thei ang tih hman a ni.

Excise & Narcotics Department minister Pu Lalnghinglova Hmar chuan he hun hi a hmanpui a, thusawiin 'India ram zalenna sualtute'n nunna hial chanin ke an en a, an mahni avangin India ramin zalenna a nei a ni a ti a, Chutiang bawkin Mizoramah sawrkar, khawtlang, tlawmngai pawl leh kohhranin ruihhlo an do a, a rah hmu nghal mai lo mah se beidawng lova an do zel chuan Mizoram hi ruihhlo lakah a la zalen ngei ang tih beisei chungin ruihhlo do zel ni se a ti.

Ruihhlo Do Kawngzawhpui hi Excise & Narcotics Commissioner Pu Z. Lalhmangaihan a kaihruai a. Pu Peter Zohmingthanga, Joint Commissioner of Excise & Narcotics chuan kalkhawmte ruihhlo laka fihlim tur leh ruihhlo dona kawnga an mawhphurhna hlen tura intiamna a kaihruai a. School hrang hrang atangin zirlai 250 chuang an tel a, Central YMA OB leh Central YMA Kumpulan Committee te bakah Department thawktute leh ruihhlo dona kawnga mi thahnemngai mi 400 chuangin kawng an zawh a ni.

<><><>

#### LADC

Lai Autonomous District Council a, Chief Executive Member Pu C. Lalmuanthanga leh Lunglei Assam Rifles Commandant, Col. Jaswinder Singh-a te chuan ram venhimna leh mipui himna tur chungchang an sawi dun.

Pu C. Lalmuanthanga chuan ramin a hun tawn mek avang hian kan fimkhur tlan a ngai hle a, International Boundary hnaihah awm an nih bakah raltlan engemawzat an awma, an ni ho denchhen hian thil thalo inzep a awm ve theih avangin, fimkhur a ngai hle a, hetiang lam hawia inkawmna hi a pawimawh hle a ni a ti.

Col. Jaswinder Singh, Commandant pawhin, LADC area chu International Boundary hnaih a awm a ni a, inkalpawh awlsam tak a nih bakah, thenawm Myanmar in harsatna an tawh lai anih bawk avangin, mipuite an fimkhur angai hle a. Chuvangin mipuite nen ram venhimna kawngah thawhhona tha neih atul hle a ti.

CEM leh Assam Rifle hotu hian hmalakho danturte, ram mipuite an him zawk na atana rawtna awmte sawidunin, venhimna leh mipui himna kawngah thawhhona tha tak neih nise an ti.

<><><>

## IDAY

Prime Minister Narendra Modia hoin naktukah Independence Day vawi 78-na Dehli-a Red Fort ah hman a ni ang. He hunah hian Prime Minister Modia chuan hnam puanzar pawtparhin ram mipuite hmaah thuchah a sawi dawn a. Kuminah hian Independence Day thupui hi Viksit Bharat @ 20247 tih a ni a.

President Draupadi Murmu-i chuan zanin dar 7 hian Independence Day vawi 78-na pualin ram mipuite hnenah thuchah a sawi dawn. President thusawi hi Akashvani leh Doordarshan te chuan rampumah an tichhuak dawn a. Hindi leh English-a tihchhuah a nih hnuah mahni tualchhung tawng theuha lehlin leh a ni ang.

<><><>

## IDAY

Kumin Independence Day pualin Police, Fire, Home Gaurd and civil defence leh Correctional service atangin mi 1037 chawimawina hlan an ni. Telangana Police Head Constable Chaduvu Yadaiah chu President's Medal for Gallantry hlan a ni dawn a. Union Home Ministry sawidanin Medal for gallantry hi mi 213 pek an ni a. President's Medal for Distinguished Service mi 94 pek zingah 75 te hi Police an ni a. Fire Service mi pariat, Civil Defence leh Home Gaurd Service mi pariat leh Correctional Service mi pathum te pek an i a. Mi 729 hnenah Medal for Meritorious Service pek a ni bawk.

<><><>

## PRESIDENTS POLICE MEDAL

Ministry of Home Affairs in Police hnathawk tha te chawimawina sang ber President's Medal hrang hrang a pek zingah Mizoram Police Officer pathum te an tel a.

President's Police Medal for Distinguished Service chu Pu Zoramsanga Ralte, MPS, Deputy Commandant, 3rd Bn. MAP hnenah hlan a ni a. Pu Zoramsanga Ralte hian kum 36 tlin leh rintlak taka hnathawkin, Aizawl Police Station ah te Officer In Charge alo ni tawh a. Kosovo UN Mission ah te kalin hnathawh that avangin UN Medal alo dawng tawh a ni.

Police Medal for distinguished Service hi Pu Kaste Romalsawma, MPS leh Inspr. Vanlalhluna, 1st IR Bn, Mualvum te hnenah hlan a ni a.

Pu Kaste Romalsawma hi kum 1995 khan Mizoram Police Sub - inspector a lak niin, Dy. SP hna a chelh mek a. A service kum 27 chung hian hlawhtlinna hrang hrang hmuin kum 2003 khan Aizawl DEF hnuaiia Investigating Officer tha ber dawtah thlan a ni a, Mizoram Police-a Subordinate Officer service lai zinga LL.B degree nei thei palina niin hnathawh that avangin DGP Commendation Disk te hlan alo ni tawh a ni.

Inspr. Vanlalhluna hian kum 36 chuang rinawm taka hnathawkin, kum 2023 khan 1st I.R Battalion Mualvum - ah Quarter Master in post a ni a. A kaihhruaina hnuaiia Battallion chhunga development works thahnem tak thawkin Battallion Complex chung hmun hrang hranga Street Light vuah a nih theih nan a thawkhlawk thin hle a ni.

<><><>